


浙江通志

自卷二十八  
至卷三十

內閣文庫	
漢書類	三九六九
冊數	六九二
函架	一四四

內閣文庫	
漢書類	三九六九
冊數	六九二
函架	一四四
(八〇二架)	

內閣文庫	
番號	漢 3969
冊數	692 (208)
函號	291 97





浙江通志卷二十八

官師志第五之八

淺草文庫

劉光世字平叔宣和中為兩浙西路安撫大使以平  
 方臘功遷鄜延路兵馬副總管紹興二年加寧武節  
 度使入見上頗自激昂曰願竭力報國他日史官紀  
 中興名將書臣功第一上曰卿不可徒為虛言當見  
 之行事後張浚召對言光世驕惰不可為大將光世  
 尋以疾乞辭蓋其御軍姑息無克復志論者咎之  
 江表宣和間為餘杭令興脩水利咸有成績善于決  
 獄人稱神明



宋昭年宣和間知秀州會睦賊方臘起陷郡縣昭年計賊必寇郡繕城隍爲備已而賊果至將方七佛引衆七萬來寇昭年與統軍王子武乘城自固賊不敢薄及大軍至乃出擊賊斬首九千朝廷嘉之進秩寵異有加

洪皓字光弼鄱陽人宣和中爲秀州司錄大水民多失業皓白郡守以拯荒自任發廩損直以糶民全集皓恐其紛競乃別以青白幟涅其手以識之令嚴而惠徧浙東綱米過城下皓白守邀留之守不可皓曰願以一身易十萬人命八感之切骨號洪佛子其後

秀軍叛縱掠郡民無一得脫惟過皓門曰此洪佛子家也不敢犯

陳吉老宣和初知長興縣爲政有風力當方寇擾攘縣境竊發吉老身任其責誅鋤強暴民賴以安

胡壑婺州教授時方臘作亂壑以勇武自奮遇害舉家死之詔贈奉議郎推恩及其二子

錢卽字中道開封人徙居毘陵舉進士爲臨安縣丞調推睦州初蒞事吏有誣服自盜抵死屬邑具獄上千郡公明其寃人皆歎服滕公甫力薦之謂異時必爲名臣三衢有寃獄久不決部使者以宿怨檄往按



治挾薦牘動之欲鍛鍊以快其私至則折獄平允全活二十三人曰吾寧老死選中豈忍殺人媚人以獲一薦哉宣和初遷顯謨直學士時童貫方用事權傾中外人皆危之卽抗章上言詆貫語多質直爭傳誦之後除龍圖閣直學士屢疏乞致仕

俞侯宣和中知歸安縣凡事處之以公朱勔請括諸路隱匿田縣獨不與鹽法屢變私販者罪甚重縣獨寬之

趙岫知德清縣青溪盜起岫聚保甲邀擊擒其二將獲兇徒二百餘人邑賴以安

黃葆光字元暉徽州黟人少刻意于學舉進士政和初爲左司諫始蒞職卽言三省吏很多非元豐舊制者乞一切革去一時士論翕然蔡京怒其異已密白上降內批云當豐亨豫大之時爲衰亂減省之計徒爲符寶郎尋復拜侍御史值歲旱葆光上疏言蔡京疆悍自專侈大過制無君臣之分鄭居中余深依違畏避不能任天下之責故致此異疏上不報京權勢震赫舉朝結舌葆光獨出力攻之京懼中以他事竄之昭州迨京罷改知處州時當方臘殘亂之後民力凋弊葆光招集流散撫綏備至民列其狀加直秘閣



再任卒之日士民哀慟罷市建祠祀之葆光家未有繪像索之民間得百餘本近時好事者乃謂葆光迎合時好倚鄭居中而劾京儕葆光于小人之列然則居言路者必避嫌疑遠嫌疑無一語而誤國事於日非者斯爲君子邪

羅適寧海人舉進士歷知五縣提點兩浙京西刑獄終朝散大夫有易說赤城集行世

彭汝方字宜老以汝礪蔭爲滎陽尉臨城主簿汝礪卒棄官歸葬豐稷留守南京辟司錄宣和初通判衢州使者疏其治狀擢知州事方臘起睦之青溪與衢

接境寇至無兵可禦衆望風奔潰汝方獨與其僚段約介守孤城三日而陷罵賊以死年六十六徽宗褒歎之超贈龍圖閣直學士通議大夫謚曰忠毅官其家七人

沈希稷字濟叔温州人宣和元年知龍泉三年睦賊洪載入寇諸邑皆陷龍泉民情洶洶希稷毅然爲守禦計賊至與戰大破之事平朝廷嘉其功增秩一等在邑五年去之日送者涕泣爲立三賢堂于玉峯寺以祀之

徐鑄字元君年少入官有能名政和初提舉兩浙常



平脩松江隄易土以石闢常熟水田數百頃爲之疆  
畎越四年以直秘閣就除轉運副使明年以徽猷閣  
待制知杭州及代以杭人安其教令特除延慶殿學  
士終正奉大夫

黃烈字元功浦城人宣和間守處州時青溪盜發先  
破杭嚴徽三郡遂陷衢婺是時處亦失守麗水松陽  
遂昌青田皆沒于賊而劍川獨完烈奉詔卽劍川治  
事能奮勇宣力區畫得宜賊將洪載以城降仍與通  
守會稽石端中謀築郡城民賴以全

吳執中松溪人嘉祐進士歷官州縣門婿呂惠卿方

貴盛不肯附以進取大觀初爲御史中丞政和中坐  
變執中奏推尋厥咎實由蔡京又言八行之舉所得  
皆鄉曲常人後以樞密直學士知越州

詹良臣字元公睦州分水人舉進士不第以恩得官  
調縉雲尉方臘起其黨犯處州守貳俱遁又有他盜  
霍成富者用臘年號剽掠縉雲良臣曰捕盜尉職也  
縱不勝敢愛死乎率弓兵數十人出禦之爲賊所執  
良臣曰汝輩不知求生顧欲降我邪旦暮官軍至汝  
肉飼狗鼠矣賊怒斮其肉使自啖之良臣吐且罵至  
死不絕聲見者掩面流涕時年七十二徽宗聞而傷



之贈通直郎官其子三人

滕膺字子勤台州戶曹參軍宣和中盜發僊居以應方臘膺率吏士禦以方畧寇不爲患泊去任民爲立祠詳見祠祀志朱子廟記

劉士英字冲發武康人以上舍擢第爲温州教授方臘寇擾士大夫皆遁去士英獨留推郡諸生石礪爲謀主聚兵禦守民賴以全後通判太原金人大入與將官王稟堅守城中食盡士英死之時年四十五門人謚爲安節先生

江休復字隣幾開封陳留人少彊學博覽以進士起家通判睦州外簡曠而內行甚飾所與游皆一時豪俊爲政簡易嘗言昭憲太后子孫多流落民間宜甄錄之著唐宜鑒十五卷春秋世論三十卷文集二十卷

王公濟字經國温陵人宣和間令瑞安方臘犯境鄰郡望風披靡公濟措置有方守要害選丁壯迎擊之賊避其鋒不能入邑賴以全旣歿民立廟祀之鞠嗣復宋史不知何許人宣和初知休寧尋知分水方臘黨破縣欲逼使降面斬二士以怖之嗣復罵曰自古歿賊豈有長義者爾當去逆從順因我而歸朝



官爵尚可得何爲脅我使降嗣復知必死不少懼屢言何不速殺我賊曰我縣人也明府宰邑有善政我不忍殺乃委之而去初嗣復聞難率吏民脩城立門衆赴工守備略就朝廷知之進其官二等加直秘閣擢知睦州乞師於宣撫使未及行而卒

常同字子正邛州臨邛人安民之子登政和八年進士靖康初除大理司直以敵難不赴辟元帥府主管機宜文字尋除太常博士高宗南渡辟浙江機幕建炎七年秋以禮部侍郎召還未數日除御史中丞車駕自建康回臨安同奏旋蹕之初去淮益遠宜遣重

臣出按兩淮詢人情利病察官吏侵擾縱民耕墾勿收租稅數年之後田野加闢百姓足而國亦足矣乃遣樞密使王庶視師同乞以此奏付庶詢究罷行又言江浙困於月椿錢民不聊生上爲減數千緡紹興八年自顯謨閣直學士出知湖州明年召赴行在會孝蘊字處善晉江人爲江浙荆淮發運使後知杭州宣和二年始復天章閣待制知歙州方臘起青溪孝蘊約敕郡內無得奔擾分兵守阨塞有避賊來歸者獲罪使出境人稍恃以安會移青州旣行而歙陷道改杭州時賊已破杭孝蘊單車至城下城旣克復



軍士多殺人孝蘊下令從者得自首無輒殺皆束手不敢驚

劉寧止字無虞歸安人舉宣和進士知秀州論疏多剴切所著有教忠堂類稿

陳與義字去非洛人登政和三年上舍甲科知湖州高宗如平江拜翰林學士知制誥尋參知政事時丞相趙鼎言人多謂中原有可圖之勢宜便進兵恐他時咎今日之失機上曰今梓宮與太后淵聖皆未還若不與金議和則無可還之理與義曰若和議成豈不賢於用兵萬一無成則用兵必不免既而從帝如

建康扈蹕還臨安以資政殿學士知湖州提舉臨安洞霄宮卒年四十九與義平居雖謙以接物然內剛不可犯其薦士於朝退未嘗以語人士以是多之李大宥新喻人紹聖間舉進士累官知虔州宣和末金人犯京師大有募兵勤王鼓行而前淮甸歌曰天下姦臣皆守室虔州太守獨勤王後知衢州州有宿寇猖獗大有下車寇即平

歐陽珣字全美吉之廬陵人舉進士授忠州學教授遷知杭州之鹽官有惠政靖康初如京師遇議割三鎮地以和金虜珣力爭其不可忤時相命出使河朔



至深州爭之益力虜怒殺之珣平生不肯折節以苟富貴其視死如歸蓋素所蓄積也

柳約字元禮華亭人大觀三年進士知睦州建炎間知台州徙嚴州兼浙西兵馬都監時金人大入諸郡震恐約獨保孤城悉力捍禦境內安堵又上書請合諸郡兵克復吳會當路忌之諷言者誣以事罷

潘良貴字子賤金華人靖康元年召賜對欽宗問孰可秉鈞軸者良貴極言何臬唐恪等四人不可用他日必誤社稷宰相呂頤浩從容謂良貴曰旦夕相引入兩省良貴正色對曰親老方欲乞外兩省官非良

貴可爲也退語人曰宰相進退一世人材以爲賢

自當擢用何可握手密語先示私恩若士大夫受其牢籠何以立朝即日乞補外以直龍圖閣知睦州

范子述成都人仕宋累官知台州主管西京御史臺靖康多難避地汝州汝守趙子櫟邀與共守於是旁郡盡陷汝獨全累官朝散大夫

陸寀字元珍任台州寧海縣丞行令事遇事立決老吏宿姦畏懾縮粟不敢輒動丞以淫祀惑民悉捕寘于法習俗爲變會遷秩父老送公出境爭贖金帛寀拒之至或泣下歷杭州仁和縣尉越州司工曹事所



至以治政稱後提舉京畿常平等事置司陳留靖康  
開會金人犯京師遊騎突至諸司皆遁去公獨以便  
宜招集燕山戍卒數千雜以保甲日夜部勒習教扼  
要害虜不能犯而潰卒亦不爲亂措置號令赫然  
有大將風采因間道上章自劾且乞犒軍詔釋罪從  
所請方是時虜剽掠四出陳留適當其衝微公幾殆  
議者謂宜出入兵間以盡其才而公罷歸矣屏居常  
州無錫縣讀書賦詩以自適

鄒柄字德久晉陵人浩子也弱冠棄科舉業從龜山  
先生游靖康初以元樞李公 布衣補承務郎除編

脩權給事出守天台行其所學類多善政莊外敏中  
與人不苟合前後奏議論列天下偉之真能世其家  
者著伊川語錄一卷文集二十卷

李邈字彥思臨江軍清江人提舉京西汴河隄岸盜  
起浙東改江淮兩浙制置司管當公事改知嚴州代  
還童貫欲以西師入燕邈復語貫曰方臘小醜一呼  
屠七州四十餘縣竭數路之力而後能平之殆天以  
此警公也何可遽移之比乎因密教貫陰佐契丹以  
圖金人貫不能用乃乞致仕貫收復燕山奏邈知涿  
州改易州皆辭不赴嘆曰國家禍亂自茲始矣後拜



青州觀察使金人至邈乞師於宣撫副使劉韜且聞道走蠟書上聞皆不報城被圍且戰且守相持四旬城破邈巷戰不克幹離不脇邈拜不拜以火燎其鬚眉及兩髀亦不顧乃拘于燕山府邈憤甚毀基金人以刀撻其口猶吮血喫之顏色不變南向再拜端坐就戮燕人爲之流涕高宗贈招化軍節度使謚曰忠壯

胡唐老字俊明宿之曾孫也崇寧間與弟世將同登進士歷南京國子博士知江陵縣召爲秘書省校書郎靖康元年擢殿中侍御史知衢州苗傅敗走以亂

兵犯城唐老拒之會大雨雹城上矢石俱發賊不支遂解去以功擢秘閣修撰未幾進徽猷閣待制充兩浙宣撫司叅謀官知鎮江府兼浙西安撫使杜充降于金建康失守潰卒戚方等趣鎮江城壁頽圯兵不滿千獨倚浙西制置韓世忠爲重世忠復去唐老度力不敵因撫之無何方欲犯臨安妄言赴行在請唐老部衆以行唐老不從諭以逆順禍福方衆環脅之唐老怒罵方遂遇害詔贈徽猷閣直學士謚定愍江安止字元靜建寧人靖康建炎間知麗水待士以禮撫民以寬馭吏以嚴禁暴戢奸號令明允盜及闖



毆必治無赦囹圄屢空案無積贖會盜發鄰郡安止  
預爲之備盜遂遁去邑境寧謐秩滿民詣闕請留在  
邑六年去之日民思之不置

崔縱字元矩撫州臨川人政和進士爲僊居縣丞累  
遷承議郎二帝北行高宗將遣使通問朝臣以前使  
者相繼受繫莫肯往縱毅然請行竟握節以死

鄭葵字致剛建州人知杭州高宗至杭鼓奏曰陛下  
南渡出于倉卒省臺寺監百司之臣獲濟者鮮當擢  
吳中之秀以爲用况天下賢俊多避地吳越宜令守  
臣體訪境內寄居待闕及見任官觀等京朝官以上

各具姓名以聞簡拔任使庶幾速得賢才以濟艱危  
詔從之建炎初用不乏人寔有得于此奏云

王淵字幾道熙州人爲都統制宣和末群盜起皆招  
赴行在獨淮寧杜用河北丁順皆擁兵數萬勢難遽  
平淵殺杜用丁順盜勢遂衰至是杭州軍校陳通作  
亂尋詔淵兼領杭州淵遂討亂卒誅之秀州軍校徐  
明等作亂秀前守臣趙叔近與淵有隙淵部曲張俊  
討明希淵言誣叔近與明同叛殺叔近建炎三年扈  
從統制苗傅劉正彥作亂殺淵梟淵首于行闕  
張俊字伯英鳳翔成紀人好騎射負才氣起於諸盜



年十六爲弓箭手建炎初討陳通於杭州蔣和尚於  
蘭溪尋破秀州縛徐明斬之金人分兵南寇高宗如  
明州兀術遣兵追帝俊命將夏榮等迎戰高橋殺退  
之建炎四年正月忽西風起金人乘之攻明州俊與  
劉洪道遣兵掩擊金人奔北死于江者無數夜拔砦  
去屯餘姚請濟師于兀術復攻明州俊懼引兵趨台  
州金師入明州屠其民高宗遂移次台州如温州江  
浙群盜蠶起授俊兩浙西路江南東路制置使招收  
群盜命後軍統制陳思恭兩浙宣撫使周望以兵屬  
之自劉光世韓世忠之外諸將皆受節度俊握兵最

早屢立戰功高宗於諸將中眷注特厚然忌劉錡附  
秦檜殺岳飛附王淵殺趙叔近論者謂其心行不端  
云

李士醫任秀州兵馬都監建炎四年兀術入州士醫  
乘城拒戰城陷死之贈武翼大夫

張燾字子公饒之德興人宣和八年舉進士爲秘書  
省正字靖康元年李綱爲親征行營使辟燾入幕及  
綱貶親知坐累者十七人燾亦預焉建炎初起判湖  
州苗劉之變賊矯詔俾燾撫諭江浙燾不受

章誼字宜叟浦城人舉崇寧進士補懷州司法參軍



歷漳台二州教授判杭州建炎初陳通寇錢塘城閉  
部使者檄誼聚杭州七縣弓兵以張聲勢會王淵討  
賊誼隨淵入城賊平旋加撫定人皆德之高宗至臨  
安苗劉爲變人心恟恟上問郡臣曰今日之事何如  
浙西安撫司時希孟輒曰乞問三軍誼越班斥之曰  
問三軍何義若將鼓亂邪希孟却立屏息上嘉之事  
定竄希孟吉陽軍誼擢倉部員外郎奉使兩浙貿易  
祠牒以濟軍用建炎五年以疾請郡除龍圖閣學士  
知温州適歲大旱米斗千錢誼用劉晏招商之法增  
直糴米米商輻輳其價自平部使者以狀聞詔遷官

一秩

趙叔近宗室也累官龍圖閣待制建炎初守秀州杭  
卒陳通反詔辛道宗將西兵討之兵潰爲亂抵秀城  
下叔近乘城諭以禍福通歛兵退詔差權兩浙提刑  
以撫通叔近輕隊入賊置酒推誠衆皆感服因奏赦  
通黨上業已許之而叔近還秀王淵兵至杭淵素與  
叔近有隙忌其功欲陷之詐傳趙秀州來通出郊迎  
淵遽殺通而誣叔近庇賊拘于州以朱薰代之秀卒  
徐明號衆囚帶出叔近叔近撫定之倉卒未及聞而  
朝旨已遣御營中軍統制張俊討明俊淵之部曲淵



諭俊必殺叔近俊至竟殺之秀民哀痛立廟祀焉  
康允之建炎三年知杭州扈從統制苗傅劉正彥作  
亂殺王淵分捕內侍皆殺之傅黨入內奏曰傅等不  
負國家止為天下除害耳允之見事急請高宗御樓  
撫諭傅等更乞康履腰斬臍其肉梟首與淵首相望  
并捕會擇斬之劫高宗傳位皇子粵請隆祐太后臨  
朝允之遁赭山明年兀朮兵自獨松關入遂犯臨安  
允之棄城走錢塘令朱蹕死之

劉海建炎中金兀朮軍至杭州守臣康允之棄城退  
保赭山時誨自楚州赴召在城中軍民推之為守後  
死於難贈直龍圖閣

朱良字良伯吳郡人為海鹽尉建炎車駕南幸金兵  
寇境上良曰此臣子効死時也集射士奮殺金兵披  
靡卒以衆寡不敵死之

朱蹕安吉人知錢塘縣建炎三年十二月兀朮完顏  
宗弼犯臨安守臣康允之棄城退保赭山蹕率民兵  
延敵逆戰死之時尉曹將金勝祝威亦以力戰死鄉  
人瘞二人于錢塘門外見祠祀志

張浚字德遠綿竹人舉進士建炎間累官秀州諸路  
軍馬控扼副使苗劉之亂浚在平江寓書已願浩謀



舉勤王之師詆賊悖逆朱勝非恐生他變乃奏貶浚  
郴州安置浚得命卽袖之趣發至秀州賊僞詔大赦  
厚犒諸軍浚於府庫中檢舊詔令遣人馳十數里外  
易之屬吏宣詔但爲撫諭之詞大犒諸軍群情賴以  
不搖是夜有刺客至浚所浚覺問曰非苗劉遣汝刺  
我邪卽取吾頭去客曰某亦知順逆豈爲賊用且侍  
郎忠誠安忍相加宜益嚴備恐有嗣我者至浚下執  
其手問姓名且欲用之但云河北人有母在卽歸不  
言姓名翌日浚取郡獄死囚斬以徇日夜得奸細疇  
張俊亦在秀州浚以其才深結之會韓世忠舟師亦

至浚與世忠饗將士問以順逆衆皆感憤願浩亦自  
江寧來赴中外勤王兵集者五萬浚部兵次臨平賊  
黨屯拒世忠等搏戰大破之傅正彥遁追及斬之國  
步遂定拜浚知樞密院時年三十二

韓世忠字良臣延安人宣和初以討方臘功授武節  
郎建炎三年爲御營統制獲苗傅劉正彥誅之進浙  
西制置使分屯江東以備金明年邀擊金兀朮于江  
中大敗之是時世忠以八千人拒兀朮十萬之衆尋  
復爲金人所敗然金人自是知憚亦不復渡江世忠  
性慙直勇敢忠義事關廟社必流涕極言屢詆和議



觸秦檜及解兵罷政凡十年卒孝宗朝追封斬王謚忠武子彥直彥質彥古皆以才見用

韓彥直世忠子登進士第調太社令累官兵部尚書兼知臨安府屢進讜言後以龍圖閣學士提舉萬壽觀卒封斬春郡公嘗擬宋朝事分爲類自名水心鏡凡百六十七卷

鄧根建炎初知崇德縣與討陳通及徐明功遷知秀州

李光字泰發上虞人建炎四年知臨安時值初議駐蹕光遂經營擗節不擾而辦紹興間守台州踰月參

知政事時秦檜搆和議榜欲藉光名同押榜以息浮議同郡楊煒上書責光附時相取尊官隳平時大節旣而檜議撤淮南守備奪諸將兵權光遂極言和不可恃備不可徹數於上前言檜壅蔽耳目盜權懷姦檜大怒令万侯高論之瓊州安置後以郊恩復年踰八十卒孝宗朝賜謚莊肅幼子孟傳累官太府丞陳淵字知默南劍沙縣人紹興七年詔侍從舉直言極諫之士胡安國以淵應除監察御史淵面對論王安石學術又論鄭億言億言秦檜親黨也檜怒罷淵主管台州崇道觀



程俱字至道歙人進士建炎初直秘閣歷知秀州會  
車駕臨幸召對俱陳濟大業致中興之策言極剴切  
有曰陛下盛德日新政事日舉賞罰施置仰當天意  
俯令人心則趙氏安而社稷固其間蓋不容髮上忻  
然納之及虜騎南渡據臨安遣兵破崇德海鹽俱厲  
兵守禦時朝議主和令俱遷避尋以病乞歸

范宗尹字覺民襄陽人宣和三年進士建炎初累官  
觀文殿學士知温州時金人入陷明州上走温州金  
人退上將西還召羣臣議駐蹕之所呂頤浩曰宜駐  
浙右徐圖入蜀宗尹曰若便入蜀恐兩失之據江衣

而圖關陝則兩得之決擇取舍不可不審上然之遂  
發温州至越州下詔親征尋以宗尹爲尚書右僕射  
兼知樞密院宗尹初與秦檜善嘗力薦其忠檜後見  
上意欲用宗尹從而擠之上亦漸惡宗尹爲政多更  
易御史沈與求奏其罪狀遂罷去

趙鼎字元鎮解州聞喜人崇寧進士歷官尚書右僕  
射兼知樞密院事時劉麟合金人寇鼎贊上親征上  
曰朕當爲卿臨江決戰鼎喜曰累年退怯敵志益驕  
今聖斷親征成功可必果大破金人於大儀鎮張浚  
又廢鼎言浚可大任乃召除知樞密院上語浚曰趙



鼎真宰相天使佐朕中興可謂社稷之幸也浚在江  
上其屬呂祉數加離間遂與鼎睽異鼎求去出知紹  
興府未幾鄜瓊叛浚去位鼎復相上欲遠竄浚鼎救  
解之後秦檜主和議與鼎不合竟謫潮州安置檜命  
本軍月具存亡鼎遣人與其子汾曰檜必欲殺我我  
死汝曹無患遂不食而死孝宗卽位謚忠簡

楊存中本名沂中字正甫紹興間賜名存中代州崞  
縣人存中魁梧沈鷺少警敏誦書數百言力能絕人  
慨然語人曰大丈夫當以武功取富貴焉用俯首爲  
腐儒哉於是學孫吳法善騎射宣和末山東河北群

盜四起存中應募擊賊積功至忠翊郎復以功遷閣  
門祗候建炎三年討賊徐明于嘉興先登主帥將屠  
城存中力諫止之戮其渠魁而已郡賴以全

杜杲字子昕邵武人初福建提點刑獄陳彭壽檄攝  
閩尉民有甲之子死誣乙殺之驗髮中得沙而甲舍  
旁有池沙類髮中者鞠問子果溺死江淮制置使李  
玘羅致幕下滁州受兵檄杲提偏師往援甫至民蔽  
野求入避滁守固拒杲啓鑰納之金人圍城數重杲  
登陴中矢益自奮厲卒全其城調江山丞兩浙轉運  
使未幾辟監崇明鎮崇明改隸淮東總領與總領岳



珂議不合慨然引去

趙子麟建炎初知湖州時金人南侵子麟親率將士禦敵人皆感勵死守事甫定遽罷去民攀戀涕泣御史達於上詔還郡後人祠之

趙子砥宋太祖系也仕為鴻臚丞北遷至燕山遁歸乃言金人講和以用兵我國歛兵以待和往者契丹主和議女真主用兵十餘年間竟滅契丹今復蹈其轍譬人畏虎以肉餵之食盡終必噬人若設陷奔以待之庶能制虎因復故官已而賜對稱旨命知台州趙子畫字叔問少警敏強記工書翰宣和初充詳定

九域圖志編修官建炎四年遷尚書在司員外郎兼權貨務歲收茶鹽香錢六百九萬餘緡以功進秩一階試太常少卿集太常因革禮八十篇為二十七卷復春分祀高媒禮除權禮部侍郎遷徽猷待制樞密都承旨以公族為侍從及改官制後都承旨用文臣皆自子畫始衢嚴信饒之民生子多不舉子畫請禁絕之果求補外遷徽猷閣直學士知秀州

趙子淵字清卿七歲而孤家貧力學登宣和進士除直敷文閣知臨安府金主渝盟子淵獻助軍錢十萬緡特遷一秩金人來議和子淵謂事情難測宜以軍



禮侍之孝宗嗣位志圖恢復子淵練兵習為鵝鵲魚  
麗陣上觀於便殿嘉之進龍圖閣學士移知泉州

趙希言字若訥淳熙登第調衢州司戶歷吉州司理  
臨安府司法知仁和縣除大社令遷樞密院編修官  
兼右司上言諸將但務城守敵來不拒去不復追異  
時之憂殆不止保江而已宜諭諸將一軍受圍諸軍  
兵共守敵不渡淮則均受賞以戰為守毋以守為守  
累遷秘書丞著作郎嘉定十七年卒封越國公謚忠

憲

李顯忠綏德軍青澗人也太后至臨安顯忠入覲加

保信軍節度使浙東副總管建炎二年討賊徐明于  
嘉興郡賴以全金人攻明州又與田師中趙密殊死  
戰破之顯忠熟西邊山川險易因上恢復策忤秦檜  
意遂降官奉祠台州居住乾道改元乃還會稽復防  
禦使觀察使浙東副總管

晏敦復字景初丞相殊之曾孫第進士紹興初為左  
司諫居兩月論駁凡二十四事議者憚之秦檜使所  
親諭敦復曰公能曲從要地旦夕可至敦復曰吾終  
不為身計誤國家况吾薑桂之性到老愈辣請弗言  
檜卒不能屈胡銓謫涪州臨安遣人械送貶所敦復



往見守臣張澄口銓論宰相天下共知祖宗時以言事被謫爲開封者必不如是澄媿謝爲遣還始檜拜相制下朝士相賀敦復獨有憂色曰姦人相矣張致遠魏矼聞之皆以其言爲過至是竄銓敦復謂人曰頃言秦檜之姦諸君不以爲然今方秉國便敢爾他日何所不至邪以寶文閣直學士知衢州閑居數年卒年七十一敦復靜默如不能言立朝論事無所避高宗嘗謂之曰卿骨鯁敢言可謂無忝爾祖矣吳曾崇仁人高宗時獻所著書累官吏部郎奉祠久之起知嚴州去貪吏恤良民善政著聞平生苦學爲

文竒偉所著有得閑文集能齋漫錄諸書

婁寅亮字陟明永嘉人政和進士爲上虞丞建炎四年高宗至越寅亮上疏請選昌陵之後帝讀之感悟樞密富直柔薦之紹興元年召赴行在以其言宗社大計擢監察御史時秦檜以其爲直柔所薦惡之諷言者論廢

呂頤浩字元直建炎二年高宗渡江自鎮江如杭州時頤浩從行卽拜同僉書樞密江淮兩浙制置使值苗劉之變頤浩與朱勝非張浚等討平復辟初與上定幸武昌之議旣乃以道遠饋餉難繼遂升杭州爲



臨安府爲定都之計尋進尚書左僕射時起居郎胡  
寅上七策願浩惡其切直罷之于外旣而兼領兵柄  
尤爲顯恣中丞趙鼎上疏論願浩過失凡千餘言詔  
罷爲鎮南軍節度使紹興元年八月入對首言先平  
內寇然後可禦外侮上深然之復爲尚書左僕射兼  
知樞密院事時上在越州願浩請如臨安從之初盜  
桑仲據襄陽劇甚范宗尹念鄉國被禍請赦仲罪授  
以鎮撫使至是仲請合諸鎮兵復中原願浩信之屢  
請出師遂以願浩都統江淮荆浙諸軍事開府鎮江  
已而桑仲死願浩前軍將趙延壽叛于呂城鎮犯全

壇殺知縣胡思忠願浩遂稱疾不進召還行在願浩  
薦紹興知府朱勝非代已都督胡安國爲給事論勝  
非不可用願浩言安國以時艱不肯盡瘁欲求微罪  
而去遂罷安國及臺省陳瑀等二十人尋爲侍御史  
辛炳常同論願浩過惡多端罷職提舉洞霄宮

曾紆鞏之弟以詞翰名有志節建炎間嘗力勸湖州  
郡將梁端會起兵勤王後官至直寶文閣知衢州  
陳俊卿字應求莆田人紹興進士爲松陽令秦檜以  
不附已出判南劍檜死授校書郎孝宗受禪奏陳七  
事乾道元年除吏部侍郎授尚書右僕射同中書門



下平章事隨以觀文殿大學士帥福州淳熙二年召對垂拱殿命坐賜茶因從容奏曰去國十年見都城穀賤人安惟士大夫風俗大變上曰何也俊卿曰向士大夫奔競於權門尚畏人知十纔一二今則公然趨附十已七八不復顧忌矣人才進退由私門大非朝廷美事十三年十一月卒謚正獻有集二十卷翟汝文字公異丹陽人登進士為翰林學士改顯謨閣學士知越州兼浙東安撫使建炎改元上疏言陛下卽位赦書上供常數後為獻利之臣所增者當議裁損揚應誠請使高麗圖迎二帝汝文奏應誠欺罔

君父紹興元年召為翰林學士參知政事時秦檜相四方奏請填委吏緣為姦汝文入對乞治堂吏受賄者檜怒面劾汝文專擅右司諫方孟卿因奏汝文與長官立異豈能共濟國事罷去卒先是汝文在密檜為郡文學汝文薦其才故檜引用之然汝文性剛不為檜屈對案相詬至目檜為濁氣汝文風度翹楚好古博雅精於篆籀有文集行世

林叔豹字懿文永嘉人建炎初為慈谿令廉明勁直高宗南巡戒衛士毋苛擾聞虜寇至境邑人驚避有武悍之徒一二人為民所訟叔豹捕而斬之於是遠



近知畏絕剽掠之患虜破明州僞立蔣安義爲守虜  
退叔豹率鄉兵入城杖死安義一郡尋安高宗駐蹕  
臨安召爲監察御史

呂祉字安老建州建陽人宣和初上舍釋褐建炎二  
年爲右直言以論事忤執政通判明州又奏國家養  
兵仰給東南數路而已方今財用悉出民力而邑令  
乃近民之官也令得人則一邑足守得人則一郡足  
漕得人則一路足諸路足則朝廷足矣時蔡京起用  
楊時驟躋要近小人歆豔之遂變其中服更相汲引  
曰此伊川之學也夷考其行育而所不爲者祉上

疏論之於是學者始知所向官至兵部尚書值鄴瓊  
叛被執罵瓊不已遂碎首折齒而死時有得祉括髮  
之帛歸其家者其妻吳氏持之自盡以徇葬聞者傷  
之

權邦彥字朝美河間人崇寧間賜上舍及第建炎三  
年歷官江浙諸路制置發運使轉輸六路夕受命朝  
引道走江東西董媮惰檢欺隱覈逋亡責稽滯水陸  
五千餘里財用湊足於行在以億萬計紹興二年建  
中興十議入爲僉書樞密院事尋權叅知政事預政  
幾一年碌碌無所建明又嘗助呂頤浩以排李綱士



論少之

曾忘字仲常中書舍人鞏之孫也補太學內舍生通判温州湏次于越建炎三年金人陷城以琶八爲帥約詰旦城中文武官並詣府有不至及藏匿不覺察者皆死忘獨不往爲鄰人糾察捕見琶八詞氣不屈且言國家何負汝乃叛盟欺天恣爲不道我宋世臣也恨無尺寸柄以死國安能貪生事爾狗奴邪左右皆愕眙相視琶八且令出左右盡驅其家屬四十口同日殺之忘弟朝散郎忌時知餘杭葬之天柱山事聞官其弟忌子密兄子宥皆將仕郎忌其從弟悟翰

林學士肇之孫爲金所執不屈死之

胡則知温州寬賦除苛提舉銀銅場鑄錢監得吏所匿銅數萬斤吏懼自死則曰吾豈重貨而輕人命乎籍爲羨餘不之罪

宋汝爲字師高豐縣人建炎初呂頤浩使致書劉豫遇兀朮軍爲所拘紹興中亡歸授通判處州後金人議和知汝爲言其機事秦檜將械送金人汝爲變姓名爲趙復徒步入蜀青城山而卒所著有忠嘉集劉燭字晦伯建陽人遷浙西提點刑獄巡歷不避寒暑多所平反



唐文若字立夫眉州人登進士第高宗時爲秘書郎  
作文思箴以獻及勸收西北人材以固根本深見嘉  
納出知温州有政績累遷敷文閣待制  
雲彞建炎三年知永嘉縣廉介有才幹事雖蝟紛處  
之泰然四年高宗車駕臨幸禁衛省部蠹供億曲盡  
其道有事卽直奏中宮咸畏憚之嘗面奏本州沒官  
田宅多皇族勲戚請佃不輸賦稅請賣以供億少甦  
民力詔從之由是車駕所臨供應雖繁而民不困當  
時皆稱其能

韓肖胄字似夫相州安陽人曾祖琦祖忠彥再世爲

相父治肖胄以蔭補承務郎先北使入對與朱勝非  
議不合力求去以舊職知温州提舉臨安府洞霄宮  
除資政殿學士知紹興府尋奉祠與其弟膺胄寓居  
于越幾十年事母以孝聞所得恩澤皆先給宗族卒  
年七十六謚元穆琦守相作畫錦堂治作榮歸堂肖  
胄又作榮事堂三世守鄉郡人榮之但肖胄專附王  
次翁君子猶有所未滿焉

田渭字伯清縉雲人舉進士調辰州教授五溪之人  
皆知向學自渭始後在朝八年以廉靖自持故舊多  
居要路渭恥私附前後奏對十餘疏如固國本正風



俗審機會變役法多當世要務淳熙丁未除浙東提  
舉常平值歲大歉涓究心荒政罷苛歛除民瘼台發  
處三州戶科茶稅及五等差大送迎之擾涓並奏罷  
之民賴以安

王居正字剛中楊州人知婺州州貢羅舊制歲萬疋  
崇寧後增五倍建炎中減爲二萬至是主計者請復  
崇寧之數居正力言于朝戶部督趣愈峻居正置檄  
不行語其屬曰吾願身坐不以累諸君呼吏爲文書  
付之曰卽有譴以此自解復手疏五不可以聞詔如  
建炎中數漕司市御炭頭胡桃文鶉鴿色者居正曰

民以炭自業者率居山谷安知所謂胡桃文鶉鴿色  
邪入朝以聞詔止之後知温州又多善政

夏榮字子顯大梁人崇義使承皓之玄孫也少好儒  
術善騎射宣和中從張叔夜累立戰功授秉義郎大  
元帥康王詢大策稱旨遣就宗朝戰金人于衛州敗  
之遷武經郎建炎間從張俊戰苗劉敗走之遷武經  
大夫後兀朮遣部將阿里蒲渾追帝明州榮從楊存  
中迎戰高橋身中十八餘鎗甲嘗爲赤勇氣益奮士  
卒感激殺退金虜陞兩浙節度使封英國公子玦以  
恩補浙東總管府幕



高世則以節度使判温州所得俸祿積二萬緡請以禪郡費當時皇族居溫者多橫世則以勲戚重望鎮之民賴以安

尤與求字必先德清人舉進少為相恐悞國事出知台州西安撫劉光世來朝以方物何時而有此獻上命斥還之言和親乃金人屢試之策不事見時事多不與之相聞遂出知明州

浙江通志卷二十八

浙江通志卷二十九

官師志第五之九

王綸字德言建康人紹興五年進士為婺州臨安府教授權國子正時初建太學無舊規吏緣為姦綸釐正之歷除同知樞密院事金將渝盟邊報沓至綸乞備禦已而金且即盟乃以綸為稱謝使至金金主連發數問綸條對不屈尋還朝言鄰國恭順和好宰臣湯思退等皆賀已而疾作乞外遷知建康敵犯江綸每以守禦利害驛聞上多從之卒謚章敏王倫字正道萃縣人文正公旦之從玄孫也家貧無



行爲任俠往來京洛間數犯法建炎初選能專對者  
使金倫乃預選往與粘罕反覆議和縱之歸紹興二  
年秋倫至臨安入對言金人情僞甚悉上優獎之除  
脩撰主管杭州萬壽觀已而往復使金主遣張通  
古爲江南詔諭使偕倫來朝論以金使肆嫚多歸罪  
倫倫泣曰倫涉萬死一生往來虎口者數四今日乃  
責倫如此遂復與通古議許歸梓宮太母及河南地  
倫乃復如金金拘倫河間六載欲授以平灤三路都  
轉運使倫曰奉命而來非降也金益脅以威倫遂冠  
帶南向再拜慟哭曰先臣文正公以直道輔相兩朝

何器刻

天下所知臣今將命被留欲汗以僞職臣敢愛一死  
以辱命遂就死於是河間地震雨雹三日不止人皆  
哀之論者謂倫雖市井無賴使金屢被拘留脅以僞  
官乃竟不受而死當日胡銓之疏豈亦有激于秦檜  
孫近而云然耶

王次翁字慶曾濟南人試禮部第二歷婺州教授知  
處州乞祠歸寓于婺秦檜召還道出婺次翁見之檜  
居朝遂援引次翁歷官至御史中丞知趙鼎與檜不  
協遂論罷鼎官鼎歸會稽上書言時政檜忌鼎復用  
乃令次翁又言之乞顯置于法尋除次翁叅知政事

何倫



時兩浙牒試主司觀望檜與次翁子姪預選者數人  
士論大駭檜擅國十九年凡居政府者莫不以微忤  
黜去終始不二者惟次翁耳

陳康伯字長卿信之弋陽人中上舍內科通判衢州  
攝郡事盜發白馬原康伯督州兵濟王師進討克之  
累遷戶部郎中康伯與秦檜太學有舊檜當國康伯  
在郎省五年泊然無求後因金使至詔康伯爲館伴  
端午賜扇與論拜受禮言者以生事論罷檜死起知  
漢州歷官至尚書左僕射

邵文炳紹興間爲於潛令興水利減山鄉折米價遷

中書民懷其德政建祠于縣南與丞相葉衡同祀

朱勝非字藏一蔡州人崇寧二年上舍登第建炎初  
試中書紹興初知紹興府時呂頤浩初領都督江淮  
諸軍之命已而悔之稱疾不進乃引勝非代爲都督  
給事中胡安國奏勝非先與黃潛善汪伯彥同在政  
府緘默附會馴致渡江尊用張邦昌結好金虜及正  
位冢司苗劉肆逆貪生苟容辱及君父今強敵憑陵  
用人得失繫國安危深恐勝非上誤大計乃罷都督  
之命改兼侍讀仍知紹興

王德字子華通遠軍人建炎初從劉光世勤王爲前



軍統制秦檜忌其英勇罷爲浙東副總管善謀有膽所向無敵先是從熙帥姚古擒隆德府僞守姚太師獻于朝欽宗問狀姚曰臣就縛時止見一夜叉耳時遂號爲王夜叉

張子益字德高其先鳳翔人後徙秦州初從韓世忠捕苗傅補承信郎紹興間累官兩浙西路馬步軍都總管智識過人謀慮精審屢有戰功虜人號爲小鐵山

洪擬字成季丹陽人舉進士歷知温州有治劇才宣撫使孟庾討閩寇過郡命擬犒師甚急擬借封椿錢用之已乃自劾詔褒其知變

蔣行簡字仲可永嘉人進士歷明州市舶監紹興中知海鹽有聲實還朝獻所著樞言五十篇通判興國軍知處州聞趙汝愚謫死遂感疾不起

潘大臨字舜舉嘗以兩浙運司主管文字官攝温州獲海寇五十閱其實釋無辜者半復以太府寺丞出權真州茶鹽時相丁大全使人諷之曰有羨獻卽受賞大臨曰吾一錢皆籍縣官羨於何取大全怒馳代者夜半奪印去

胡沂字周伯餘姚人進士甲科紹興間爲秀州軍事



狀元通志卷之五  
推官當播遷之餘民窮盜起獄訟繁滋沂一以忠厚  
臨之而不廢發摘郡賴以安改宣州教授終禮部尚  
書為名臣謚獻簡

賈廷佐東陽人高宗時為桐廬主簿紹興十二年秦  
檜復相專主和議廷佐上疏論檜辭甚切直而史不  
載其七世孫權出以示人世之士大夫為文以稱其  
忠廷佐之名始顯于天下事在 本朝宋濂文集景  
定諫疏序中

黃揚紹興間知崇德縣治燬于建炎已二十年揚至  
始營構之事集而民不擾

魚承字少潛常熟人紹興中知海鹽治學宮築海堤  
二十里民有宿逋檢縣藏得羨餘悉為代輸郡有疑  
獄一時平反

臧梓紹興間為壽昌令循良清謹字民有道殿中侍  
御史張絢以聞既核實令再任以觀政績高宗曰若  
得賢令如此一方皆受其惠非細事也趙鼎對曰一  
縣生靈十萬縣令得人則皆安業上曰然朕區擇監  
司守令政欲安百姓也既而教化大行為三輔最  
汪藻字彥章饒州德興人舉進士調婺州觀察推官  
進龍圖閣直學士知湖州上言欲集元符庚辰至宣



和乙巳詔旨爲日曆制可詔賜餐錢聽辟屬編類越  
二年書成凡六百六十五卷上之藻升顯謨閣學士  
遣使賜賞其屬鮑延祖孟處義咸增秩有差時胡仲  
亦有文名時人爲之語曰江左二寶胡仲汪藻其後  
言者論藻嘗爲蔡京王黼門客奪職

陳之茂字卓卿無錫人紹興中知湖州爲政嚴肅時  
金人寇邊之茂脩城治器械聚糧食東南士大夫挈  
家依之

周宗字彥廣湖州人紹興中守滁陽濠梁淮楚宗爲  
立約束結保伍民賴以全活者甚衆兩淮流民多依  
之後遷知臨安上言自古風化必自近始陛下躬履  
節儉而貴近奢靡殊不知革乃陳禁革十五事上嘉  
納之

劉清之字子澄先世臨江人後徙吉之廬陵舉紹興  
進士爲建德主簿欲應博學宏詞科及見朱熹卽盡  
取所習詞業焚之慨然志於理學及遷秩歸至呂祖  
謙書院講論經義留數月乃去時張栻守嚴陵尚未  
識清之已乃知之往復論議遂相孚契清之天分旣  
高所學日益造詣遂成鉅儒後知常州改衡州當路  
惡之諷言者論罷及卒朱子爲文祭之曰子澄立志



高雅信道深堅居閒則講道著書樂衆人之所不樂  
從官則養民善俗憂衆人之所不憂賢者與之遊則  
常幸其有思齊聞過之益不賢者與之處則常病其  
有明污招過之羞然世之賢者少而不賢者多是以  
子澄之得譽寡而蒙毀衆道不行於一州而遂齎志  
以終也是豈不可爲之深悲而痛恨也邪

吳孝臣字正仲永嘉人少從周行已學與兄鼎臣同  
舉太觀進士高宗至永嘉訪求人材因用趙鼎薦召  
對于江心寺稱旨除監察御史扈從還越遷右正言  
歷吏部尚書翰林學士秦檜欲使金議地界指政事

堂曰歸來可坐此表臣不答坐罷起知婺州進敷文  
閣待制乞祠祠滿再除知婺州清約自持復請祠以  
全脫節檜怒命言者劾罷之

胡寅字明仲建寧人文定公安國之子也學者稱爲  
致堂先生紹興六年以徽猷閣待制知睦州政教並  
行民用胥勸明年文定公自衡山抵書曰汝在桐江  
一年矣大凡從官作郡一年未遷卽有怠意汝宜作  
三年計日勤一日思遠大之業未幾移知永州

胡寧字和仲以蔭補官秦檜召試館職除敕令所刪  
定官秦熺知樞密院事檜問寧曰熺近除外議事云



何寧曰外議以爲相公必不爲蔡京之所爲也遷大常丞祠部郎官主管台州崇道觀卒安國之傳春秋也修纂檢討多出寧手寧又著春秋通旨以羽翼其書云

楊大異字同伯醴陵人嘉定十三年進士調龍泉縣尉攝縣事適歲飢提刑司遣吏和糴米一萬石子邑米價頓增民乏食大異卽以提刑司所糴者如價發糴民甚德之提刑趙與憲大怒坐以方命謫安遠招降峒寇所至有惠政

劉大中字立道真州人紹興七年自兵部尚書知處州在任激濁揚清抑強扶弱所部肅然初民輸秋租監官恣下漁取大中令輸戶自解吏不能爲擾未幾召還除禮部尚書尋再知處州乞祠提舉臨安洞霄宮

秦檜字會之江陵人政和進士靖康元年汴京失守金人議立張邦昌御史馬伸言于朝檜亦抗疏以爲不可胡安國深信之及從徽欽北行南還力主和議高宗遂拜爲相胡安國游酢等皆爲所愚和遂以定紹興六年以觀文殿學士知會稽卽召赴闕獨相十九年方岳飛偃城屢捷檜蠱惑高宗以十二金牌召



還與万侯高誣成飛獄天下寃之

孫近紹興六年以龍圖閣學士知會稽八年十一月召爲參知政事胡銓上疏論王倫因及近謂近附會秦檜和議遂得參政漫不敢可否事參贊大臣徒取充位如此亦可斬也

汪待舉字懷忠衢州人紹興中知處州爲政寬厚曲盡下情民有爭訟呼之使前面究曲直不以屬吏故庭無留事箠楚罕用百姓以詩頌之曰官舍却如僧舍靜吏人渾似野人閒時部民嘗有以酒飲客者客醉且卧空舍中主人慮其去又從而鑰之客夜酒薄

索漿不可得則取花瓶水飲之次日啓鑰客已死矣其家訟于官公究其一時舍中所有物惟瓶浸旱蓮而已試以飲極刑因果死訟乃白其明察如此

沈樞安吉人舉進士調彭澤丞用葉義問薦賜對首論君子小人之辯高宗嘉之除監察御史坐不附楊邦彥獲譴貶端州尋起知温州

葉顥字子昂莆田人紹興中自司農寺丞出守衢州明習法令吏不能欺待下以嚴僚屬敬畏先有詔減民間屋租之半官吏視爲虛文奉行不虔至是悉與蠲免民始蒙實惠時有青田令獻羨錢百萬公詰其



錢自何來命以所獻代本縣民戶輸納夏稅民益感之  
成無玷字士慈武康人少有才氣善文崇寧四年夏  
趙懷德舉國効順無玷撰端門受降頌以獻之徽宗  
覽而褒之明年賜進士及第調江山令宰相李綱薦  
其文武才畧召對除刪定官紹興初金人犯順呂頤  
浩復薦守鄂州修築城壘教閱士伍與士卒死守抱  
病而歿朝野惜之

葉紹興人紹興十七年知龍泉令行禁止訟牒至庭  
灼見誠僞民所爭辨必曉之以理委曲開諭其抵罪  
者咸自輸服習俗好爭紹教以懲忿息怒全身養生  
率多感化先是邑佐括民老病以為隱丁抑之輸納  
縮驗而免之邑人至今頌其遺愛

洪遵字景嚴樂平人皓仲子也自兒時端重如成人  
從師業文不以歲時寒暑輟父留沙漠母亡遵孺慕  
攀號既葬兄弟即僧舍肄業夜枕不解衣以父蔭補  
承務郎與兄适同試博學宏詞科中魁選賜進士出  
身高宗以皓遠使擢為秘書省正字中興以來詞科  
中選即入館自遵始宰相秦檜子熺為長官聲歎為  
人輕重遵恬然不附麗二年弗遷皓南還與朝論異



出守遂乞外通判常婺越三州所至有惠政後知平  
江金人由海道窺二浙助副總管李寶禦之成功孝  
宗時拜同知樞密事知建康府淳熙元年以資政殿  
學士提舉洞霄宮卒謚文安

洪邁樂平人皓季子中博學宏詞科紹興末假翰林  
學士使金書用敵國禮金人怒鎖使館後得還孝宗  
卽位拜中書舍人直學士院後知婺州紹興皆有善  
政以端明殿學士致仕卒謚文敏所著有容齋隨筆  
夷堅志

陳良翰字邦彥臨海人紹興五年進士知瑞安縣有

惠政累官左司諫疏論湯思退奸邪張浚精忠出知  
建寧府後以敷文閣直學士奉祠良翰在朝論諫純  
正卒謚獻肅

仇愈字泰然益都人大觀中進士歷知明州挫豪強  
獎善良吏受賕雖一錢不貸姦猾斂迹州罹兵火旣  
燬愈斥厨錢助其費歲饑發官儲減直以糶民無死  
徙朝廷聞之進秩一等再召進對上親加褒諭再知  
明州愈在明州嘗欲薦一幕官問曰君日費幾何對  
以十廿之家日用二千愈驚曰吾爲郡守費不及此  
屬僚所費倍之安得不貪遂止



揚獬新喻人紹興間舉進士知吉水救荒有政累官  
司農少卿知明州沿海有小寇獬悉擒之海道晏然  
生平廉介自持博覽強記爲後學所歸法鄉人至今  
祠之於學

游九功建陽人紹興中知慶元有古循吏風

王淮字季海婺州人由台州臨海縣尉至淳熙八年  
拜右丞相逮事光宗初朱熹爲浙東提舉淮寔薦之  
熹後劾知台州唐仲友淮素善仲友遂不相協乃擢  
陳賈爲監察御史俾上疏言近日道學假名濟僞請  
詔痛革之鄭丙爲吏部尚書相與叶力攻道學熹山

此奉祠遂啓慶元道學之禁

李浩字德遠臨川人早有文名尤深理學紹興中登  
第除吏部郎應詔直言無所避忌知台州軍士謀亂  
浩一語卽定孝宗特用爲廣西帥轉吏部侍郎

尤袤字延之常州無錫人紹興進士知台州前守趙  
汝愚修郡城工纔什三屬袤成之築加高厚明年大  
水城賴以不沒有毀袤者高宗疑之使人密察民頌  
其善政不絕口孝宗嘗語宰執曰尤袤甚好前此無  
一人言之何也詔直學士院光宗卽位言者以爲周  
必大黨遂與祠時國事多舛袤積憂成疾卒



朱倬字漢章閩縣人舉進士張浚薦于朝與秦檜忤  
出教授越州梁汝嘉制置浙東表攝叅謀有群寇就  
擒屬倬鞠問獨竄二人餘釋不問曰此饑民剽食耳  
烏可盡繩以法遷國子監丞除浙西提舉召對高宗  
曰人不知卿朕獨知卿除右正言嘗曰人主任以耳  
目非報怨任氣之地每上疏輒夙興露告若上帝鑒  
臨紹興三十一年拜尚書右僕射金兵犯江陳戰備  
應三策又策敵必妄意絕江果如所料史浩虞允文  
王淮陳俊卿劉珙之進用皆倬所薦也

鄧剛中字亨仲金華人舉進士紹興間通判温州

事敢為善籌策歲大饑出俸勸糶流民甚衆饑民受  
實惠初剛中由秦檜薦于朝檜主和議剛中不敢言  
既剛中為四川宣撫使事多專擅忤檜徙封州卒  
汪應辰字聖錫信州玉山人紹興進士第一時秦檜  
力主和議應辰上疏論檜大不悅遂請祠以歸寓居  
常山之永年院益以修身講學為事浩然之氣不為  
少屈張九成謫邵州交遊皆絕應辰時加通問人皆  
危之趙鼎貶死朱崖應辰為文祭之曰惟公兩登上  
宰皆值艱危之時一斥南荒遂為生死之別事已定  
於蓋棺恩特榮於歸骨徯守章傑希檜意指應辰為



阿附死黨徧鞠之胡寅言乃寢檜又欲殺張浚事逮  
應辰檜死幸免召爲吏部郎官以母老乞外出知婺  
州仕終端明殿學士應辰流落嶺嶠十有七年少從  
呂居仁胡安國遊張栻呂祖謙劉珙深器許之  
范寅孫姑蘇人文正公之曾孫也紹興十七年爲平  
陽縣丞治政勤能急于民事興修水利人多賴之  
曾幾字吉父其先穎人徙河南禮部侍郎開之弟也  
試吏部銓中優等賜上舍出身擢國子學正時禁元  
祐學術甚厲而以剽掇熟爛爲文博士弟子更相授  
受公獨憤歎思一洗之一日得經義絕倫者出其文

誦之公卿聳聽稱善乃內舍生陳元有作也元有遂  
錄用文體爲之少變歷兩浙西路提點刑獄時秦檜  
用事怒開幾亦罷寓上饒七年讀書賦詩蓋將終焉  
紹興二十五年起提點兩浙東路刑獄幾時已老而  
精明不衰去太猾吏張鎬一路稱快明年知台州禁  
戢豪右尋授秘書少監歷禮部侍郎隆興二年上章  
謝事遷左通議大夫致仕乾道二年年八十三卒謚  
文清有集三十五卷

范成大字致能吳縣人紹興進士隆興中出使金國  
竭節盡忠累官叅知政事出知明州乾道中知處州



所至留心民事水利橋梁無不脩舉以資政殿大學士奉祠成大素有文名尤工於詩所著有石湖集攬轡錄驟鸞錄虞衡志吳舡錄

楊愿字原仲歷新昌縣丞越州判官奏檜薦之召改樞密院編脩官登紹興二年制科進士遷計議官召試館職罷主管崇道觀復除秘書郎議者謂外任未終改通判明州

胡理晉陵人宣和中進士嘗從學劉安世操行端方紹興初召試翰林兼史館校勘命理刪定舊史忤執政出知嚴州

芾字子禮晉陵人紹興中進士第二累官至右僕射同中書門下平章事兼樞密使時有手詔議大舉兵廷臣或主和或主恢復使芾決之芾奏天時人事未至拂上意尋除觀文殿大學士知紹興府

葛勝仲字魯卿丹陽人紹聖四年進士調杭州司理參軍林希薦試學官及詞科俱第一尋知汝州李彥括田破產者衆勝仲請蠲不當括者彥怒劾勝仲上寢其奏改湖州尋徙鄧州朱勳先求白雀之屬勝仲不與媒孽罷歸建炎中范宗尹爲相凡前日以朋附被罪遠貶者咸赦還復知湖州時群盜縱橫聲搖諸



郡勝仲脩城郭作戰艦閱士卒賊知有備引去歲大  
饑發倉廩賑之民賴以濟紹興元年乞祠歸卒謚文  
康

孫覲字仲益晉陵人舉進士文章不爲俗態靖康中  
爲執法爲詞臣旋由項闥歷吏戶長貳知秀州温州  
臨安諸郡其章疏制誥表奏明辯駁發每一篇出世  
爭傳誦紹興以後遭值口語出居家郡久之歸隱太  
湖上時年已邁爲文屬辭少吐所不逮孝宗朝嘗命  
編類蔡京王黼等事實上之史官年九十餘卒所著  
有鴻慶集行于世

周葵字立義宜興人紹興中爲侍御史欲奏論戶部  
尚書梁汝嘉汝嘉致辭於秦檜出葵知湖州檜蓄怒  
未已又易平江值兩浙運使李椿年卽平江行經界  
法欲增田租三十萬葵辨其不可忤椿年椿年還都  
希檜意奏葵在郡宴金使飲食臭敗致金人有詞遂  
落職罷任葵謝表有云雖宰夫是供各盡其職耳然  
王事有缺是誰之過歟自是投閒十五年後卒官叅  
知政事謚簡惠

袁樞字機仲建安人試禮部詞賦第一調温州判官  
除太學錄求外補出爲嚴州教授居常喜誦司馬光



資治通鑑苦其浩博乃區別其事而貫通之號通鑑紀事本末

盧知原字行之德清人高宗初知溫州甚得民紹興三年以徽猷閣待制知臨安府奏乞撥兵馬鈐轄司回易庫歸臨安府從之尋除宮祠

梁汝嘉字仲謀麗水人歷守明溫台婺諸郡皆有政聲初言金人難與和親及東京留守孟庾不可任因忤用事臣意諷言者劾之未幾金果背約孟庾亦以東京降如其言終寶文閣學士致仕嘗曰以清白遺子孫家居鄰郡學捐地基以創齋廬至今繪像于學

春秋祀之

張澄紹興初為臨安知府逢迎便捷敏于應辦苟可媚上不恤民艱希附秦檜望風趨承胡銓上疏論和議觸檜怒謫銓涪州下臨安遣發澄械銓送貶所司諫晏敦復謂澄曰銓論宰相天下共知祖宗時以言事被謫為開封者必不如是澄亦有愧色後知紹興再知臨安改知溫州所至委曲流俗以邀時譽

李寶河北人嘗陷于金時淮浙姦民倪詢梁簡等教金人造舟且為鄉導寶拔身自海道來歸紹興三十年九月召對詢以北事歷歷如數乃以寶為浙西副



總管令於平江督海舟捍禦明年十月金主亮渡淮分軍數萬圍海州寶與知州魏勝合擊大敗之遂與其子公佐引舟師至膠西石曰島敵舟已出海口操舟者皆中原遺民遙見寶舡給敵兵入舟中無復行次寶命火箭射之延燒數百艘降其衆三千餘人斬其將完顏鄭家等六人擒倪詢等上于朝獲其符印器甲糧斛以萬計時虞允文又大敗金人于采石金亮至瓜洲爲其下所殺三十二年春山東人耿京起兵復東平遣其將辛棄疾來朝京尋爲其部將張安國所殺棄疾乃約寶徑趨京營卽帳中縛安國獻于

臨安斬之金人復攻海州魏勝告急于寶寶命張子蓋率銳卒數千助勝等力戰賊又大敗未幾孝宗卽位用史浩爲相寶等功名遂不終云

顏師魯字幾聖漳州龍溪人紹興中進士累官監察御史尋改使浙西役法敝甚細民遇役輒破家師魯下教屬邑預正流水籍稽其役之序寬比限免代輸咸便安之鹽課歲百鉅萬久不給私鬻禁不可止刑辟日繁師魯搏帑緡盡償宿負戒官吏毋侵移比旁路課獨最上謂執政曰儒生能辦事如此農民有墾曠土成田未及受租者姦豪多爲已利師魯奏但當



正其租賦不應繩以盜種奏可遂著為令

趙不怠字仁仲濮王宗暉曾孫初補保義郎紹興二  
十七年舉進士易左宣義郎調婺州金華丞治縣豪  
何汝翼械請於郡編隸他州邑人憎服累進明州觀  
察使居官所至有聲其所敬者朱熹張栻栻死為請  
謚又請用熹其好尚如此

錢端禮台州人紹興三十年以右中大夫充祕閣脩  
撰兩浙計度轉運副使知臨安府改除戶侍以直敷  
文閣黃仁榮知臨安府九月底禮再知初命臨安府  
印造會子許於城內外與銅錢並行端禮乞令左藏

庫應支見錢並以會分數品搭用度從之東南用會  
子自此始

洪興祖字慶善鎮江丹陽人少讀禮至中庸頓悟性  
命之理績文日進登政和上舍第為湖州士曹宣教  
郎紹興四年蘇湖地震興祖時為駕部郎官應詔上  
疏具言朝廷綱紀之失為時宰所惡主管大平觀直  
敷文閣興祖好古博學自少至老未嘗一日去書著  
老莊本旨周易通義繫辭要旨古文孝經序贊離騷  
楚詞考異行于世

翁蒙之常山尉時趙鼎喪自嶺表歸郡守章傑檄蒙



之取其私書將以媚執政蒙之不從士論多之  
朱敦儒字希真河南人爲布衣時初有朝野之望累  
召皆固辭紹興中詔下故人勸之始幡然而起累遷  
兩浙提典刑獄敦儒素工詩及樂府時秦檜當國先  
用敦儒子爲刪定官復除敦儒爲鴻臚少卿檜死敦  
儒亦罷談者謂敦儒老牛懷舐犢之愛而畏避鼠逐  
故其節不終云

葉衡字夢錫婺州人有才智紹興末知於潛以善政  
稱然不十年至宰相進用之驟人謂出於魯覲淳熙  
二年孝宗宴于玉津園謂衡等曰朝廷用人止論其

賢否如何不可有黨如唐之牛李其黨相攻四十年  
不解皆緣主聽不明所以至此文宗乃言去河北賊  
易去朝中朋黨難朕常笑之爲人主者但公是公非  
何緣有黨又曰近來士大夫好倡爲清議此語一出  
切恐相師成風便以趨事赴功者爲猥俗以矯激沽  
譽者爲清高駸駸不已如東漢激成黨錮之風深害  
治體豈可不戒司諫湯邦彥奏衡有訕上語尋罷



浙江通志卷三十

官師志第五之十

吳芾字明可僊居人舉進士遷秘書省正字與秦檜  
 故舊至檜專政芾退然如未嘗識檜疑之風言者論  
 之出判處婺越三郡遷知處州處舊苦丁絹重芾損  
 之以新丁補其額除監察御史勸高宗專務脩德求  
 合乎天地無愧乎祖宗則人心悅服天亦助順矣兩  
 淮戰不利廷臣爭陳退避計芾言今日之事進為上  
 策退為無策既而車駕駐建康芾請遂駐蹕以係中  
 原之望且言建康控帶襄漢可以經理淮甸應接梁



宋臨安所不若也尋知臨安權豪歛戢嘗曰視官物  
當如已物官事當如私事與其得罪百姓寧得罪上  
官立朝不偶晚退閑者十四年自號湖山居士爲文  
豪健峻整有表奏五卷詩文三十卷

張本

王信字誠之麗水人紹興三十年進士孝宗時爲考  
功郎官有三蜀士礙式應免時相爲囑信持弗聽上  
聞之謂尚書蔡沉曰考功得王信銓曹遂清遷太常  
少卿權中書舍人信遇事剛果論奏不避權要由此  
人多嫉之信亦力求去旣而起知湖州據按剖折敏  
如流泉擢集英殿脩撰知紹興府兼浙東安撫使奏

免逋官錢十四萬絹七萬疋綿十萬五千兩米二十  
萬斛山陰境有狹狻湖四環皆田歲苦潦信創啓斗  
門導停渚注之海築十一壩化匯浸爲上腴民繪象  
以祠更其名曰王公湖築漁浦隄禁民不舉子買學  
田立義冢衆職脩理尋上章請老以通議大夫致仕  
喻樗字子才其先南昌人初愈藥仕梁位至安州刺  
史武帝賜姓喻後徙嚴州樗其十六世孫也少從龜  
山楊時游獨得其奧舉建炎進士累官工部郎中當  
紹興間力主正論爲時師表天下稱之孝宗即位用  
爲提舉浙東常平以治績聞所著有易義及玉泉講



解語孟大學四書性理窟行于世

辛次膺字起季萊州人紹興中以直秘閣知婺州清  
苦自持有善政隆興元年六月遷同知樞密院事對  
孝宗曰王十朋除侍御史雖上親擢天下皆知臣薦  
其賢湯思退召將至亦知臣嘗疏其奸臣與思退理  
難同列孝宗曰有謂思退可用者次膺對曰思退固  
不足道竊恐有誤國家事耳屢以足疾求去加秘閣  
脩撰致仕

李蕪宣城人博學工詩揚萬里推許之知台州居官  
有守既卒吏民爲之巷哭罷市所著有詩文及郡志  
薛抗字君平常州武進人隆興初爲寧海令清介絕  
俗甚有政譽邑濱海水鹵民甚苦之公于邑東北廣  
度坊側鑿井得泉甚甘爲亭於其上以便民汲自後  
次第凡開八井邑人利賴咸以公姓名之曰薛公井  
嘉定間郡守齊碩因民思公不已乃爲文以記之見  
地里志子極公爲今時所生蓋隆興二年也

唐闕字進道山陰人舉進士兩浙歲饑詔以闕爲浙  
東檢察使時州縣賑濟勸民減價而糶豪右往往閉  
糶闕奏儲粟之家宜勿限以價勿計以數則趨利之  
徒將傾困競售不待低昂而價自平民饑不相保小



兒遺棄衢路國法三歲以下許異姓收育聞請雖及  
十歲權聽民鞠養以爲己子孝宗可之於是全活甚  
衆

程大昌字泰之徽州休寧人紹興二十一年進士著  
十論言當世事獻於朝擢太平州教授明年召爲大  
學正秘書省正字孝宗即位遷著作佐郎歷浙東提  
點刑獄會歲豐酒稅踰額有挾朝命請增額者大昌  
力拒之曰大昌寧罪去不可增也徙江西轉運副使  
大昌曰可以與利去害行吾志矣光宗嗣位徙知明  
州尋奉祠

程叔達黟人嗜學至老不倦舉進士典湖學後以論  
時弊擢爲御史賑濟二浙甚有勞績除右正言遷左  
司諫累官華文閣直學士卒謚莊節所著有玉堂等  
集

薛良朋隆興二年以兩浙轉運副使知臨安府警戢  
盜賊究心職事除直龍圖閣

劉銓字全之樂清人進士隆興中知海鹽大水害稼  
被檄檢傷放秋苗數萬斛貧不能輸者請于朝得停  
閣勸富人發廩賑飢民無畊資貸于郡給之學舍久  
廢徹圭租二百斛倡修之政務循良飾以儒術耻於



求名

李彥穎字秀叔德清人紹興十八年進士爲餘杭主簿調建德丞時宰知其才將處之博士或勸一見彥穎耻自獻不往調富陽丞歷知紹興府勤約有惠政尋知婺州捐屬縣稅十三萬緡人皆德之累官觀文殿學士致仕彥穎自奉澹約與州縣了不相聞卒年八十一

林光朝字謙之莆田人再試禮部不第聞吳中陸子正嘗從尹焞學因往從之游自是專心聖賢踐履之學通六經貫百氏言動必以禮四方來學者無慮數

百人南渡後以伊洛之學倡東南者自光朝始然未嘗著書惟口授學者使之心通理解嘗曰道之全體全乎太虛六經既發明之後世注解固已支離若復增加道愈遠矣孝宗隆興元年光朝年五十進士及第以集英殿脩撰出知婺州多善政

施師點字聖與上饒人爲臨安府教授乾道元年陳康伯薦賜對言歷年屢下詔恤民而惠未加浹陛下軫念惟恐一夫失所郡邑搜求惟恐財賦不集毋惑乎日降絲綸恩不霑被細民旣困於倍輸又困於非法重以歲惡室且懸磨租不如期積多適負今明堂



肆赦戶自四等以下逋自四年以前願悉除免上曰  
非卿不聞此言詔從之

丁銳會稽人秀州司戶在官著仁政活民書二卷行  
世

李祥字元德常州無錫人隆興元年進士為錢塘縣  
主簿時姚憲尹臨安邏者以巧發為能每事下有司  
必監視鍛鍊囚服乃已嘗誣告一武臣子謗朝政鞫  
于獄祥不使邏者入門既而所告無實具以白尹尹  
驚曰上命無實乎祥曰即坐譴自甘憲具論如祥意  
上曰朕免誤矣卿吾爭臣也遂賜憲出身為諫大夫

祥調濠州錄事叅軍

龔興湘陰人乾道五年進士剛介廉潔為浙東檢法  
隨憲按部郡饋遺皆不受憲聞大慚以其已受者還  
之後知萍鄉民戶逼官賦興以已俸代輸終福建運  
幹身後家無擔石之儲

王希呂字仲行宿州人南渡後自北歸南寓居嘉興  
乾道五年舉進士授秘書省正字歷兵部吏部尚書  
以端明殿學士知紹興府希呂天性剛勁遇利害無  
所回護惟是之從居官廉潔歸老至無屋可居  
張栻字敬夫廣漢人浚之子也學者稱為南軒先生



以理學爲朱熹呂祖謙之友乾道五年以直秘閣知睦州奏蠲丁鹽錢絹民甚德之旅名山斥淫祠其治不嚴而威不疾而速一以教化爲先務凡所作用皆儒者事

趙善堅宋宗室家於袁州乾道間舉進士嘗通判婺州朱熹爲常平使者深器重之時大旱善堅奉行荒政全活甚衆後五典名藩所至以廉能稱官至戶部尚書

孟浩宜春人乾道間知武寧縣有聲累遷知湖州以忤權貴罷後復起官至直秘閣爲人廉介一毫不妄

取予爲文章有法度所著有廳杖集

王炎歙縣人爲潭州教授以薦知湖州炎初著易辨未竟而病篤夜分祝天曰願湏更無死以成此書病少瘥書成果卒

林藏字子禮吳人舉進士乾道中爲浙東提舉常平五年知秀州所至有善政博學高才尤長于漢隸錢孜嘉禾人淳熙四年爲昌化令興舉學校與錢冰卞園齊名元凌縉唐山紀事有美政思錢卞之句陳擘福唐人淳熙五年知淳安創義倉募義役興滯補廢民甚便之



顏度字魯子淳熙九年自朝奉大夫直寶文閣知湖州度旁通釋氏典每以善惡果報之說喻人人不忍欺凡聽訟於純朴中時出智巧多得其情  
丘密字宗卿江陰人隆興元年進士第三人除國子博士孝宗召對密言恢復之志不可忘恢復之事未易舉乾道間知秀州時華亭捍海隄廢鹹潮壞田密奏乞剗隄瀉鹵所築合東西兩岸塘凡八十四里爲蘇湖秀三州無疆之利累官同知樞密院事謚文定  
韓彥質淳熙中守嘉興遇事精敏無阿私姦猾畏憚既政成優游撫馭郡以無事

施宿字武子長興人知餘姚縣以興廢舉墜加意風教市田置書教誨學者姚北瀕海歲役民修堤民甚苦之宿爲石堤建莊田二千畝以備修堤之役功與前令謝景初同稱

余端禮字處恭龍游人進士知烏程縣民間賦丁絹錢率三氓出一縑不輸絹而折其估一縑千錢後增至五千錢民不能勝端禮聞於朝歲蠲民緡錢六萬時孝宗志在恢復端禮言謀敵決勝之道有聲有實而古之投機者有四有投隙之機有擣虛之機有乘亂之機有承弊之機上喜曰卿可謂通事體矣後



以觀文殿大學士判慶元致仕

楊王休象山人幼肄業僧舍雪積其背而不自覺乾道中舉進士仕爲黃巖尉禁戢奸豪人稱鐵面少府累遷至禮部侍郎

蕭燧字照鄰新喻人紹興十八年授平江府推官二十三年秦檜親黨密告燧秋試必主文曹臺燧詰其故曰丞相有子就舉欲以屬公燧怒曰敢欺心至是邪檜懷之旣而不預校文秦熺果中前列燧浮沉州縣十餘年淳熙中累遷至國子司業刑部侍郎出知嚴州嚴地狹財匱燧儉以足用二年之間積至十五

萬以其美補積進邑皆寬尋移婺州歲旱浙西常平司請移粟于蘇燧謂東西異路不當與然安忍坐視舊治之災爲請諸朝發太倉米賑之

謝深甫字子肅臨海人舉乾道二年進士爲嵯縣尉歲飢有死道旁者一嫗哭訴曰吾兒也傭于某家遭掠而死深甫疑焉廉得嫗子匿於他所嫗驚伏曰某與某有隙賂我使誣告耳皆抵誣罪自是人不敢欺爲浙曹考官一時士望皆在選中曰文章有氣骨可望而知調知青田侍御史葛邲顏師魯文薦之孝宗召見深甫言今日人才枵中侈外者多妄誕矯訐沽



激者多眩鬻激昂者急于披露而或鄰于好夸剛介者果于植立而或鄰于太銳靜退簡默者寡有所合而或鄰于立異故言未及酬而已齟齬事未及成而已挫抑於是趨時徇利之人專務身謀習爲軟熟因緣攀附遂至通顯施施自得氣焰凌人一有緩急莫可倚仗臣願任使之際必察其實其人果賢則涵養之以蓄其才振作之以厲其氣栽培封殖勿使沮傷上嘉納之除大理丞江東大旱擢爲提舉常平講行荒政所全活者一百六十餘萬人累官右丞相致仕有星隕于居第遂卒

婁機字彥發嘉興人乾道二年進士爲鹽官尉以治績聞調於潛縣丞輕賦稅正版籍簡獄訟興學校改知西安縣巨室買地爲塋域發地遇石復索元價機曰設得金將誰歸遷秘書郎請續編中興館閣書目時皇太子始就外傳以機兼資善堂教授日陳正言多所裨益

王極字會卿湖州人淳熙中爲令律已清介蒞事明敏差役公平獄訟清簡興學養士風俗丕變樓鑰字大防鄞人試教官調温州教授後爲郡守淳熙十四年以朝散郎知温州屬縣樂清倡言方臘之



變復起邑令捕數人歸于郡鑰曰羅之則無可坐縱之則惑民編隸其爲首者驅其餘徒出境民言遂定在任興學校勸農桑薦賢舉善興利便民尋召赴行在後官資政殿學士

熊克字子復建陽人幼好學善屬文紹興間舉進士知諸暨部使者芮燁以循吏目之孝宗時累官學士後出知台州克博聞強記著述外無他嗜所著有高宗紀事本末及九朝通畧帝王經譜諸子菁華

沈作賓字賓王歸安人以父任入仕判紹興府帥守立密遇僚吏剛嚴作賓從容裨贊每濟以寬秩滿知

台州首訪民疾苦弛鹽禁寬租期均徭役更酒政決滯獄五十日間盡除前政之不便民者前守嫉其勝已巧媒藥之罷去民請于朝借留不遂爲立留賢碑後以煥章閣學士致仕

黃黼字元章餘杭人乾道間進士遷太常博士論對稱旨進秘書郎尋除兩浙轉運副使時浙東瀕海之田以旱澇告常平儲蓄不足黼捐漕計貸之毘陵民飢取糠粃雜草根爲食郡縣不以聞黼取民食以進乞捐僧牒緡錢濟之全活甚衆

李椿字壽翁洛州永平人熈寧安府視事三月竟以



權倖不便解去椿在朝遇事輒言執政故不悅及是轉對又言君以剛健爲體而虛中爲用臣以柔順爲體而剛中爲用陛下得虛中之道以行剛健之德矣在廷之臣未見其能以剛中守柔順而事陛下者也執政滋不悅出知婺州

危禎字逢吉臨川人舊名科淳熙進士孝宗更名禎嘉定中遷著作郎上言國家治亂之故及柴中行去國禎賦詩送之以是多忤宰相調臨安府教授出知湖州後知漳州請祠歸與鄉老爲真率會所著有巽齋諸集諸經講義及編輯先賢奏議

吳柔勝字勝之宣州人幼聽其父講伊洛書已知有持敬之學不妄言笑長游學人皆憚其方嚴登淳熙八年進士調都昌簿丞相趙汝愚知其賢調嘉興府學教授將寘之館閣會汝愚去御史湯碩劾柔勝嘗救荒浙右擅放田租爲汝愚收人心且主朱熹之學不可爲師儒言自是閒居十餘年嘉定初起遷國子正於是伊洛之學晦而復明

張杓淳熙十一年以承議郎直徽猷閣兩浙運副知臨安府撫吳越奸惡歲並用奏餘杭水傷及免諸縣舊通民歌舞之張師尹繼女掖庭恃以恣橫杓繩以



法徙家信州悉散其黨內侍毛伯益占西湖菱池與外戚交爭獄具黃緣求免杓曰吾官可去法不可屈奏論如律

劉琪字共父子羽長子也監紹興府都稅務請祠歸杜門力學不急仕進改衢州不赴

傅伯成字景初吏部員外郎察之孫少從朱熹學登隆興元年進士調連江尉試中教官科授明州教授以年少嫌以師自居日與諸生論質往復人才多因成就

周必大字子充廬陵人紹興二十年進士又中博學

宏詞科除太學錄召試館職歷官觀文殿學士進少傅先是監臨安府和劑局失火延燒民居其發火之家皆繫獄必大歎曰豈惜一官而不救人乎乃自誣服衆遂得釋人皆德之平生志行具見宋史本傳金安節知嚴州除浙西提刑赴召首言治民之道先德後刑今守令於簿書期會賦稅輸納窮日力辦之而無卓然以教化爲務者願申飭守令自今勿得甘爲俗吏朝論稱之

徐龜年崇德人淳熙末舉進士累官監察御史抗疏言士大夫之邪正實關風俗之美惡士人有廉耻則



天下美風俗矣以直華文閣知温州習倍爲之一變  
索韶字彥淳慶元府人淳熙中進士歷官左司郎中  
嘗接伴金使使者索歲幣語慢甚韶曰昔兩國誓約  
止令輸燕不聞在汴使者語塞遷臨安府尹幾十年  
理訟精簡道不拾遺平反寃獄甚多後拜浙西制置  
使仍治臨安士民雖獯黠者亦知愛戴初韶父爲郡  
小吏五十無子其妻資遣往臨安置妾旣得妾察之  
有憂色外飾以絲而中寔以麻束髮問之泣曰妾故  
趙知府女也家四川父沒家貧鬻妾以爲歸葬計耳  
卽送還之聘財之外又以囊中貲盡與之明年其妻

生

李芾字叔章衡陽人淳熙中知德清縣屬浙西饑芾  
置保伍賑民活數萬計邑有妖人扇亂附和者衆遣  
芾討之盜聞其來立解散後爲湖南提刑死節

趙漵字伯遠淳熙間爲長興令邑蝗漵募民搜捕至  
三千餘石又大旱河竭穀價騰踊漵出官錢增直糴  
粟粟商輻輳人皆得濟又增學租以造就人才士民  
咸德之

耿秉爲新城令厲廉隅勤政事興學校和民人去煩  
役除重課百姓懷之立祠以祀



胡朝穎淳安人歷官武昌令通判嘉興時鄭清之家  
奴暴橫執寘諸法移書謝云以天子之命官撻宰相  
之奴僕罪當避位清之得書以聞帝喜曰得一佳士  
矣除守岳州



浙江通志卷三十



